

Mid-Day Dogri News Bulletin, 21 July 2025

समे – 12:25 hrs.

<><><><><><>

Monsoon-Session

संसद दा बरसांती आहला इजलास अज्जै थमां शुरु होई गेआ ऐ। लोकसभा दी कार्रवाई शुरु होने पर स्पीकर ओम बिरला होरें साबका सदस्यें गी श्रद्धांजलि अर्पित कीती ते अंतर्राष्ट्री अंतरिक्ष स्टेशन थमां सुरक्षित वापस आए दे भारती अंतरिक्ष जातरी शुभांशु शुक्ला होरें गी मुबारकबाद बी दिती। एहदे परैन्त जि'आं गै सोआलें दा समां शुरु होआ तां बरोधी धड़ें दे सदस्यें पहलगाम आतंकी हमले ते आपरेशन सिंदूर पर चर्चा दी मंग गी लेइयै नारेबाजी कीती जेहदे चलदे सदन दी कार्रवाई गी दपैही 12 बजे तोहड़ी लेई स्थगित करना पेई गेआ। 12 बजे जिसलै लोकसभा दी कार्रवाई परतियै शुरु होई तां इक बारी फही सदन च डंड-रौली ज्नेय हालात गै बनी गे जेहदे चलदे स्पीकर होरें कार्रवाई गी दपैही 2 बजे तगर लेई स्थगित करी दिता ऐ। तोआई राज्यसभा च चेयरमैन जगदीप धनखड़ होरें 2 नमें चुने गेदे ते 3 मनोनीत सदस्यें गी अज्ज सगंध चुकाई। मगरा राज्यसभा च बी बरोधी सदस्यें पहलगाम आतंकी हमले ते आपरेशन सिंदूर पर चर्चा दी मंग गी लेइयै डंड-रौली पाई जिस करी राज्यसभा दी कार्रवाई गी बी दपैही 12 तोहड़ी स्थगित करी दिता गेआ।

<><><><><><>

PM-Monsoon-Session

संसद दे बरसांती आहले इजलास शा पैहले मीडिया गी संबोधित करदे होई प्रधानमंत्री नरेन्द्र मोदी होरें आपरेशन सिंदूर गी भारत दी फौजी ताकत च इक बड़्डा संगे-मील करार दिता। उ'नें आखेआ जे एह मिशन 100 फीसद कामयाब रेहा ते एहदे तैहत साढ़े सुरक्षाबलें छड़े 22एं मिंटें दे अंदर गै आतंकवादी ठिकानें गी तबाह करियै पूरी दुनिया गी भारत दी बधदी रक्षा समर्थ कन्नै वाकफ करोआई दिता। संसद दे इजलास गी, जित दा जशन करार दिंदे होई श्री मोदी होरें संसद सदस्यें गी गुजारिश कीती जे ओह भारतवासिएं ते रक्षा सरबंधी नमिएं काहडें गी बढ़ावा देने लेई इक सुर च अपनी अवाज बुलंद करन। प्रधानमंत्री होरें पहलगाम आतंकवादी हमले पर दुख बुझ्जेआ ते इस मामले गी लेइयै सब्भनैं सियासी पार्टिएं आसेआ दस्सी गेदी इकजुटता दी सराहना बी कीती।

<><><><><><>

Landslide-Katra

श्री माता वैष्णो देवी दी जातरा दे पराने रस्ते पर बाण गंगा दे नेड़े अज्ज ल्हास-पस्सियां पौने करी 1 श्रद्धालु दी मौत होई गई जिसलै के 6लोकें दे जख्मीं होने दी खबर ऐ। जख्मिएं गी मलबे हेठा बाह कड़्डियै तुरत अस्पताल पुजाई दिता गेआ। लेफ्टिनेंट गवर्नर मनोज सिन्हा होरें 1 श्रद्धालु दी मौती पर दुख बुझ्जदे होई श्राईन बोर्ड गी निर्देश दिते न जे ओह जख्मिएं गी इलाज-मुआलजे दि'आं बेहतरीन स्थूलतां उपलब्ध करोआए। साढ़े रियासी संवाददाता देवेन्द्र ठाकुर मूजब, भारी बरखें करी अज्ज बड़्डलै 8 बज्जियै 50एं मिंटें पर बाणगंगा दे नेड़े गुलशन

दे लंगर आहली थाह ल्हास-पस्सियां पेइयां जेहदे तुरत मगरा बचाs अभियान शुरु करी दिता
गेआ। हादसे दे मगरा श्री माता वैष्णो देवी जी दी जातरा गी फिलहाल रोकी दिता गेदा ऐ।

<><><><><><>

Earthquake

किश्तवाड़ जिले च जंदी रातीं भूंचाल दे झटके मैहसूस कीते गे। आकाशवाणी दे जम्मू
संवाददाता दी रिपोर्ट मूजब, जंदी रातीं 1 बज्जियै 36एं मिंटे पर किश्तवाड़ च 3 इशारिया 1
दी तीव्रता दा भूंचाल आया जेहदा केन्द्र किश्तवाड़ दे नेड़े धरतै दे कोई 10 किलोमीटर अंदर
हा। उ'आं इस भूंचाल करी जान-माल दे नुकसान दी कोई खबर नेई ऐ।

<><><><><><>

Bhal Padri Festival

सैलसफा गी बढ़ावा देने दे मकसद कन्नै डोडा जिले दे भाल-पदरी इलाके च कल आयोजित
कीते गेदे 'भाल-पदरी जंगलात ते सैलसफा उत्सव' च खरी मती गिनतरी च लोकें हिस्सा लैता।
जिला इंतजामिया ते सैलसफा मैहकमे दी सांझ-भ्याली कन्नै आयोजित कीते गेदे इस उत्सव
नै भलेसा दी कुदरती खूबसूरती ते उत्थुं दी सगगोसार सांस्कृतिक विरासत गी बड़े बधिया
ढंगगै'नै प्रदर्शित कीता। उत्सव च हिस्सा लैने आहले लोकें कल पारंपरिक संगीत, लोक नाच ते
रोमांच आहिलएं गतिविधिएं दा नंद लैने दे कन्नो-कन्नी रुक्ख-बूहटे लाने सरबन्धी इक कार्यक्रमै
च बी हिस्सा लैता। कार्यक्रम दा समापन इक बड़े बधिया मुशायरे कन्नै होआ। इस उत्सव दा

मकसद खिते च सैलसफा गी बढ़ावा देने ते इस सरबन्धी गतिविधिं च लोके दी भागीदारी जकीनी बनाना हा।

<><><><><><>

Weather

ते हून खबर मौसम दे बारै च। जम्मू-कश्मीर च मौसम दे सूरते-हाल च अज्जै थमां फही बदलाव दे असार न। मौसम विभाग नै अज्जै थमां लेइयै 23 जुलाई तोहड़ी, खिते च भारी बरखें दे असार दस्से न। मौसम विभाग नै खिते लेई बरखा सरबन्धी येलो ते ऑरेंज अलर्ट जारी कीते न। मौसम विभाग नै चेतावनी जारी करदे होई इब्बी आखेआ ऐ जे इ'नें त्र'उं दिनें दरान तेज बरखा बरने, अंधी-झकखड़ झुल्लने, चानचक्क हाड़ औने, ल्हास-पस्सियां पौने ते दरेयाएं-नालें वगैरा च पानी दा स्तर चानचक्क बधने दे असार न। एहदे परैन्त 24 जुलाई थमां लेइयै 27 जुलाई तोहड़ी बी टामीं-टामीं थाहें पर हौली बरखा बरी सकदी ऐ। करसानें गी सलाह दिती गेई ऐ जे ओह फैसलें पर छिड़काऽ दा कम्म अज्ज सबूरा करी लैन।

<><><><><><>

Traffic

ट्रैफिक पुलसै जम्मू-श्रीनगर राश्ट्री जरनैली सिड़क - एनएच44 पर जातरा लेई सलाह जारी कीती ऐ। एहदे मूजब, मौसम साफ रौहने दी सूरतै च श्री अमरनाथ जी दी जातरा कानवाई ते हौली मोटर गड़्डिं गी दौने बक्खी दा आओजाई दी खुल्ल होग। उ'आं जम्मू थमां घाटी जाने आहली गड़्डिं गी बड़्डलै 6 बजे शा लेइयै दपैही 12 बजे तोहड़ी नगराटा पार करना होग

जिसलै के उधमपुर गी पार करने लेई बड्डलै 7 बजे शा दपेही 1 बजे दा समें मुकरर कीता गेदा ऐ। इस्सै चाल्ली काजीगुंड थमां जम्मू औने लेई दिनै साङ्ढे 11 बजे शा दपेही 2 बजे दा समें तय कीता गेदा ऐ। बड्डी मोटर गड्डिएं गी इक दिन छोड़ियै इक दिन चलने दी खुल्ल दिती गेई ऐ। एहदे अलावा रियासी, कटरा, उधमपुर, पत्नीटाँप, डोडा ते रामबन जाने आहले बसनीकें गी सलाह दिती गेई ऐ जे ओह तय समें दे बाद अपने इलाकें बक्खी जाने लेई अपनी रिहायश सरबन्धी शिनाख्ती कार्ड कन्नै रक्खन।

<><><><><><>